

Cunter las influenzas

23avel Top Pop Rumantsch

■ Il pli novissim Top Pop Rumantsch è il resultat dad in casting: Gino Carigiet pretenda «Viva tia veta».

Il matg passà, a chaschun da la Higa a Cuira, ha il Radio Rumantsch organisà il casting «La Vusch», cun la finamira da chattar novas vuschs per sia famusa retscha Top Pop Rumantsch.

Victur da questa concorrenza è stà *Gino Carigiet* da Siat. Uss, in mez onn pli tard, dastga Gino preschentar ses Top Pop, «Viva tia veta». Ina chanzun scritta e cumponida dad el sez, e quai è anc in pau, per in giuvnot da 17 onns. Ma Gino Carigiet deriva dad in ambient zunt musical; sia mamma Romilda fascheva ina giada part da la gruppa Carideros, cun ina vusch che sveglia anc oz sia admiraziun. Stilisticamain preferescha il giuven sursilvan però tuns pli dirs e pli radicals – tranter ses favorits figureschan ils Nickelback canadais. A la fin pleda sia ballada per ina vita senza faussas influenzas. Buns tuns per sia vegliadetgna.

Gino Carigiet, annada 1993, è creschì si a Siat ed ha visità la scola secundara a Rueun. Actualmain frequenta el il gimnasi chantunal a Cuira, cun musica sco rom d'accent. Chantà ha el gia dapi l'uffanza, ed uss fa el quai surtut en sia band «Sow The Seeds», sunond dasper er anc il clavazin.

«Viva tia veta»

Text e musica: Gino Carigiet

Producziun e programs: Manfred Zazzi

Clavazin: Tino Horat

Bass: Lucas Schwarz

Battaria: Simon Kistler

Guitarra: Jean-Pierre von Dach



Gino Carigiet, l'autur dal novissim Top Pop Rumantsch.